

Sumáriu kazu
Tribunál Distritál Suai
Juñu 2020

Afirmasaun: Sumáriu Kazu tuirmai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma laiha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Suai

1. Totál kazu ne'ebé JSMP monitoriza: 15

Tipu kazu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika.	4
Artigu 316 KP	Kontrabandu	2
Artigu 23, 172 KP	Tentativa violasaun seksuál	1
Artigu 177 KP	Abuzu seksuál ba menór	1
Artigu 154 KP	Maus-tratus ba kónjuje	1
Artigu 225 KP	La halotuir obrigasaun alimentár	1
Artigu 146 KP	Ofensa ba integridade fízika grave	1
Artigu 145 KP	Ofensa ba integridade fízika simples	1
Artigu 1757, 1761, 1871 KS	Ezersísiu podér paternál	1
Artigu 260 KP	Danu ho violénsia	1
Artigu 1, 2, 20 (1) Lei Nú. 5/2017	Arma brankas	1
Totál		15

2. Totál desizaun ne'ebé JSMP monitoriza: 3

Tipu desizaun	Númeru
Suspensaun ba prizaun nia ezekusaun (Artigu 68 KP)	1
Omologa akordu	1
Absolve	1
Totál	3

3. Totál kazu sira ne'ebé adia tuir JSMP monitorizasaun : 4

Razaun adiamentu	Númeru
Arguida tuir prosesu kazu seluk	1
Tribunál la konsege notifika parte sira	2
Adia sein data	1
Totál	4

4. Total kazu sira ne'ebé sei kontinua prosesu tuir JSMP nia monitorizasaun: 8

B. Tuir mai deskripsaun sumáriu ba desizaun kazu sira ne'ebé JSMP monitoriza:

1. Krime ofensa ba integridade fízika simples ho natureza violénsia doméstika

Nú. Prosesu : 0187/15 BBMLV
Kompozisaun Tribunál : Singulár
Juis : Dr. Naason Mário Armino Marques Doutel
Prokuradór : Dr. Nelson José Soares Magno
Advogadu privadu : Dr. Albano Maia
Desizaun : Pena prizaun fulan 6 suspende ba tinan 1

Iha 16 Juñu 2020, Tribunál Distritál Suai liuhusi julgamentu móvel iha Maliana prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu IL hasoru nia feen (lezada), iha Munisípiu Bobonaro.

Akuzasaun Prokuradór

Prokuradór akuza katak iha 13 Dezembru 2015, dadeer, arguidu basa dala tolu iha lezada nia kotuk laran, tuku dala ida iha tilun-hun halo lezada monu ba rai no kaer lezada nia liman rasta ba iha fatuk laran. Aktu hirak ne'e rezulta lezada nia isin kanek no lezada mii-ran. Antes agresoun ne'e, lezada telefone nia inan iha Maliana atu ba haree lezada ne'ebé moras hela. Lezada nia inan hatan katak nia ba atu lori lezada ba iha Maliana. Arguidu la konkorda ho lezada nia inan no haruka lezada atu subar kuandu lezada nia inan to'o iha sira nia uma. Maibé lezada lakohi atu subar. Ho nune'e, arguidu komete aktu hirak ne'e hasoru lezada.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu sira iha akuzasaun prokuradór nian no deklarara katak arrepende ona ninia hahalok. Arguidu mós deklarara katak depoisde akontesimentu ne'e, lezada lakohi ona moris hamutuk ho arguidu nune'e agora dadaun sira hela separadu.

Aleinde ne'e, lezada mós kontinua konfirma faktu sira hotu iha akuzasaun no konfirma arguidu nia deklarasaun katak agora dadaun sira hela separadu. Lezada deklara liutan katak sira husik malu tanba tuir sira nia lisan, laiha dalan atu sira hola malu tanba sira nia relasaun família hanesan primu ho prima rasik.

Alegasaun finál

Prokuradór konsidera arguidu provadu komete krime ofensa ba integridade fízika simples tuir faktu sira iha akuzasaun no atu halo prevensaun ba krime ne'e iha futuro, husu ba tribunál atu kondena arguidu ho pena prizaun fulan ualu suspende ba tinan ida.

Entretantu defeza haktuir katak mezmu arguidu konfesa faktu sira iha akuzasaun no lezada mós konfirma faktu sira ne'e maibé husu atu absolve arguidu husi akuzasaun prokuradór nian ne'e tanba kazu ne'e liu ona tinan 4 nune'e tuir loloos krime ne'e preskreve ona.

Desizaun

Tribunál bazeia ba artigu 112 KP (1) kona-ba suspensaun ba preskrisaun no haree fali ba krime ne'e katak sei preskreve iha fulan Dezembru 2020. Tanba ne'e, tribunál rejenta defeza nia pedidu kona-ba preskrisaun ne'e.

Tribunál prova katak arguidu basa dala tolu iha lezada nia kotuk laran no tuku dala ida iha tilunhun to'o lezada monu ba rai. Tribunál mós prova katak arguidu kaer lezada nia liman no rasta ba iha fatuk laran. Bazeia ba faktu provadu sira ne'e no tetu sirkunstánsia hotu-hotu hanesan arguidu konfesa faktu sira, arrepende ninia hahalok, arguidu ninia hahalok halo lezada sofre kanek no mii-ran, ho nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

2. Ezersísiu podér paternál

Nú. Prosesu	: 0103/19.CVTDS
Kompozisaun Tribunál	: Singulár
Juis	: Dr. José M. de Araujo
Prokuradór	: Dr. Nelson José Soares Magno (representa menór sira)
Defeza	: Dr. Francisco Caitano (mandatáriu ba rekeridu no rekerida)
Desizaun	: Omologa akordu

Iha 16 Juñu 2020, Tribunál Distritál Suai liuhusi julgamentu móvel iha Maliana, prezide julgamentu tentativa konsiliaun ba kazu ezersísiu podér paternál ne'ebé envolve rekerente menór sira : ES, AG, SG, AG no AT hasoru rekeridu FT no rekerida ES (menór sira nia inan no aman), iha Munisípiu Bobonaro.

Termu no fundamentu sira

Rekeridu no rekerida moris hamutuk hanesan feen ho la'en no sira iha oan na'in haat. Rekeridu sai husi uma no abandona sira nia oan inklui rekerida hodi ba moris hamutuk fali ho feto seluk. Rekeridu abandona nia obrigasaun nu'udar aman ba menór no nunca fó ona alimentasaun ba menór husi kedas tempu ne'ebá. Ho nune'e, rekerida apresenta pedidu ba Ministériu Públiku hodi husu podér paternál ba menór sira.

Kazu ne'e relaciona ho ezersísiu podér paternál (responsabilidade inan-aman ba menór sira) tuir artigu 1757, 1758(1), 1759, 1762, 1765, 1786, 1787(2), 1782, 1804 no 1805 KS.

Tentativa Konsiliaun

Iha julgamentu tentativa konsiliaun ne'e, rekeridu hanesan aman konkorda atu menór sira nafatin hela ho rekerida, tempu vizita iha lora feriadu ka bainhira oan sira halo tinan no sei fó alimentasaun ba ninia oan sira US\$25.00 kada fulan liuhusi rekerida. Rekeridu deklara katak nia laiha kapasidade atu fó liu husi US\$25.00 tanba nia nu'udar agrikultór. Maibé kuandu hetan serbisu, rekeridu promete sei fó liu husi montante ida ne'e.

Aleinde ne'e, rekerida hanesan inan konkorda ho rekeridu ninia pedidu kona-ba osan refere, hela fatin no rejime vizita nian katak kuandu oan sira feriadu husi eskola ka menór sira halo tinan, rekeridu bele lori menór sira ba halimar iha rekeridu nia uma durante lora ida ka rua.

Alegasaun finál

Prokuradór reprezenta menór husu ba tribunál atu omologa akordu ne'ebé rekeridu no rekerida konkorda hamutuk atu tau-matan ba menór sira no rekeridu bele vizita menór sira iha tempu oan sira feriadu ka oan sira halo tinan.

Entretantu mandatáriu husi rekerida no rekeridu husu ba rekeridu atu tenke kumpri nia obrigasaun sira. Entretantu ba rekerida, mandatáriu husu atu la bele bandu rekeridu bainhira vizita menór.

Desizaun

Bazeia ba parte rua nia akordu kona-ba alimentasaun, hela fatin no rejime vizita, tribunál konklui prosesu ne'e no omologa akordu ne'e.

3. Krime arma brankas

Nú. Prosesu : 0001/19 BBATB
Kompozisaun Tribunál : Koletivu
Juis : Dr. Naason Mário Armindo Marques Doutel, Dr. José M. de Araujo no Dr. Benjamin Barros

Prokuradór : Dr. Nelson José Soares Magno
Defeza : Dr. Albano Maia
Desizaun : Absolve

Iha 20 Juñu 2020, Tribunál Distritál Suai prezide julgamentu leitura akordaun ba krime ofensa ba integridade fízika simples no arma brankas ne'ebé envolve arguidu Filomino Pires hasoru lezadu Vitorino Marques, iha Munisípiu Bobonaro.

Akuzasaun Prokuradór

Prokuradór akuza katak iha 01 Janeiru 2019, iha oras tuku 16:00 lokraik, arguidu uza katana no taa dala ida iha lezadu nia liman parte loos rezulta kanek ki'ik. Antes ne'e, lezadu duun arguidu buan nune'e arguidu ho lezadu diskute malu to'o arguidu halo agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2(b) no 20(1) husi Lei Arma Brankas ho moldura penál tinan 3 to'o tinan 6 prizaun.

Antes tama ba produsaun ba prova sira, tribunál halo tentativa konsiliaun ba parte sira no lezadu hakarak deziste tiha keixa hasoru arguidu tanba sira di'ak malu ona. Arguidu konkorda ho pedidu lezadu nian ne'e. Bazeia ba konkordánsia husi parte sira, tribunál omologa tiha pedidu dezisténsia ne'e. Depoisde ne'e, tribunál kontinua halo prosesu julgamentu ba krime arma brankas.

Produsaun ba prova sira

Iha julgamentu, arguidu deklara parsialmente ba faktu sira iha akuzasaun katak nia kaer duni katana atu halo nia lutu maibé derrepente lezadu ho ema barak ba diskute malu ho arguidu no trata arguidu dehan buan. Arguidu deklara liutan katak lezadu atu baku malu ho arguidu ho nune'e mak arguidu defende-an ho katana refere no katana ne'e kona iha lezadu nia liman rezulta kanek ki'ik. Arguidu hatutan katak katana refere nia hola iha Loja Xina ho folin US\$3.00 hodi uza lere to'os la'os atu taa ema. Mezmu nune'e, arguidu deklara arrepende ninia hahalok no promete sei la komete tan hahalok ne'e iha futuru.

Alegasaun finál

Prokuradór haktuir katak mezmu arguidu konfesa parsialmente ba faktu sira katak nia hola katana refere hodi uza lere to'os la'os atu taa ema no arrepende ona ninia hahalok, maibé atu halo prevensaun iha futuru, husu ba tribunál atu kondena arguidu ho pena prizaun tinan tolu suspende ba tinan haat.

Entretantu defeza haktuir katak arguidu nu'udar agrikultór no lori tuir katana atu uza lere to'os ka natar la'os atu taa ema. Tanba ne'e, husu ba tribunál atu absolve arguidu hosi krime armas brankas tanba arguidu laiha intensaun aat ho katana refere.

Desizaun

Depoide avalia faktu sira hotu, tribunál prova katak arguidu nu'udar ema agrikultór ida no iha momentu ne'ebá arguidu lori duni katana ho intensaun atu uza ba hadia nia lutu iha nia uma oin. Tribunál mós prova katak arguidu uza duni katana refere hodi defende nia-an bainhira lezadu ho nia kolega sira ba diskute malu ho arguidu no tenta atu baku malu ho arguidu. Bazeia ba faktu provadu sira ne'e no tetu mós sirkunstánsia sira hotu ne'ebé haleu krime ne'e, tribunál konklui hodi absolve arguidu hosi krime ne'e.

Atu hetan informasaun liutan bele kontaktu:

Ana Paula Marçal

Diretora Ezekutivu JSMP

Email: ana@jsmp.tl

Telefone: 3323883 | 77040735

info@jsmp.tl

Website: <https://jsmp.tl/>